

03 AUG 2004

Permaisuri-Mahathir

DR MAHATHIR BERJAYA MELETAKKAN NEGARA SEBAGAI ANTARA YANG TERMAJU

PULAU PINANG, 3 Ogos (Bernama) -- Rakyat sentiasa bangga dengan pencapaian bekas Perdana Menteri Tun Dr Mahathir Mohamad memimpin negara dan berjaya meletakkan Malaysia sebagai antara yang termaju dan mampu keluar daripada kemelut yang dihadapi.

Raja Permaisuri Agong, Tuanku Fauziah Tengku Abdul Rashid bertitah yang penting ialah keyakinan beliau terhadap keperluan menguasai sains dan teknologi dan menerokai bidang baru serta kesanggupan meredah Antartika.

Apa yang telah dilakukan oleh beliau membuktikan jiwa besar Dr Mahathir telah membuka pemikiran rakyat untuk bersaing seiring dengan mereka yang telah melakukannya selama ini, titah baginda pada majlis santapan Tuanku Canselor di sini malam ini sempena upacara Konvokesyen Universiti Sains Malaysia (USM) Ke-33 esok. Raja Permaisuri Agong ialah Canselor USM.

Yang di-Pertuan Agong Tuanku Syed Sirajuddin Syed Putra Jamalullail turut berangkat pada majlis itu. Yang Dipertuan Negeri, Tun Abdul Rahman Abas dan isteri, Toh Puan Majimor Shariff, Ketua Menteri Tan Sri Dr Koh Tsu Koon, Naib Canselor USM, Profesor Datuk Dzulkipli Abdul Razak serta anggota Lembaga Pengarah USM hadir pada jamuan itu.

Tuanku Fauziah bertitah rakyat negara ini menjadi bangsa yang tidak tertinggal daripada penguasaan sains dan teknologi, malah lebih hebat lagi melalui pegangan kukuh terhadap nilai agama dan moral yang tinggi.

Sambil mengucapkan tahniah kepada Dr Mahathir yang akan dianugerahkan Ijazah Kehormat Doktor pada sidang pertama konvokesyen itu esok, baginda meminta semua pihak di universiti merenung dan mengambil iktibar daripada pemikiran dan cabaran yang telah dilakukan oleh Dr Mahathir selama ini.

"Saudara saudari harus berani menerokai pemikiran baru, memantapkan kekuatan yang ada dan membangunkan bidang keutamaannya untuk

bersaing di
peringkat dunia," titah baginda.

Baginda turut meminta universiti supaya ideal daripada segi
pemikiran
dan budaya ilmu serta menjadi titian pembangunan masyarakat memimpin
kepada
teknologi baru dan menyediakan sumber manusia berilmu untuk membuka
pemikiran baru dalam masyarakat.

Pada majlis itu Tuanku Fauziah berkenan melancarkan Edisi Khas
buku
bertajuk 'We Lead USM 1969-2004' yang merakamkan pembangunan dan
sejarah
USM yang diterbitkan oleh Persatuan Alumni USM.

--BERNAMA

SA RV BK